

古今尺牘大觀
上編二



古今尺牘大觀 上編

第二冊

目錄

達情類

恬淡

漢郭泰答友勸仕進書

魏應璩與從弟君苗君胄書

蜀秦宓答王商書

晉王羲之與吏部郎謝萬書

晉羊祜與從弟琇書

晉陶潛與子儼等疏

宋雷次宗與子姪書

齊張融與吏部尚書王僧虔書

梁張充與尚書令王儉書

北齊祖鴻勳與陽休之書

唐王績答馮子華處士書

唐王績答刺史杜之松書

唐張嘉貞答勸置田園札

唐韓愈與孟東野書

唐韓愈與衛中行書

唐李翱與翰林李舍人書

唐白居易與元微之書

唐白居易答戶部崔侍郎書

側豔

漢司馬相如報卓文君書

漢秦嘉妻徐淑答夫嘉書

魏文帝答繁欽書

梁簡文帝答新渝侯和詩書

梁何遜爲衡山侯與婦書

陳伏知道爲王寬與婦義安主書

北周庾信爲梁上黃侯世子與婦書

牢騷

漢司馬遷報任安書

漢李陵答蘇武書

漢李陵與蘇武書

漢楊惲報孫會宗書

漢馮衍與婦弟任武達書

漢臧洪報陳琳書

晉趙至與嵇茂齊書

梁王僧孺與何炯書

唐崔國輔上何都督履光書

唐朱灣別湖州崔使君書

唐韓愈與崔羣書

唐柳宗元寄許京兆孟容書

唐柳宗元與楊京兆憑書

唐柳宗元與裴埴書

唐柳宗元與顧十郎書

唐柳宗元與蕭翰林俛書

唐柳宗元與李翰林建書

唐羅隱投同州楊尙書啟

唐羅隱河中辭令狐相公啟

抒懷

魏阮籍答伏義書

宋周朗報羊希書

宋王微報何偃書

齊劉善明遺崔祖思書

齊劉善明再答釋僧巖

梁江淹與交友論隱書

梁江淹報袁叔明書

梁徐勉報伏挺書

梁王僧孺答江琰書

陳陳暄與兄子秀書

唐駱賓王與程將軍書

唐于邵與元相公書

唐柳宗元答貢士元公瑾論仕進書

唐柳宗元上湖南李中丞啟

唐羅隱答賀蘭友書

雜類

晉袁喬與左軍褚裒解交書

晉庾亮追報孔坦書

晉陸雲弔陳永長書

宋王微以書告弟僧謙靈

宋顏延之弔張茂度書

宋袁淑與始興王濬書

宋喬道元與天公牋

梁簡文帝東宮上掘得慈覺寺鐘啟

梁任昉弔樂永世書

梁劉峻追答劉秣陵沼書

陳謝貞遺疏告族子凱

隋薛道衡弔延法師書

唐張說弔陳司馬書

唐李白代壽山答孟少府移文書

唐劉軻代荀卿與楚相春申君書

古今尺牘大觀 上編

第二冊

杭縣 姚漢章
張相 纂輯

達情類

恬淡

漢郭泰答友勸仕進書

吾晝察人事。夜看乾象。天之所廢。不可支也。方今運在明夷之爻。值勿用之位。蓋盤桓潛居之時。非在天利見之會也。雖在原陸。猶恐滄海橫流。吾其魚也。況可冒衝風而乘奔波乎。未若巖岫頤神。娛心彭老。優哉游哉。聊以卒歲。

魏應璩與從弟君苗君胄書

璩報。間者北游。喜歡無量。登芒濟河。曠若發矇。風伯埽塗。雨師灑道。按轡清路。周

望山野亦既至止。酌彼春酒。接武茅茨。涼過大夏。扶寸肴修。味逾方丈。逍遙陂塘之上。吟詠苑柳之下。結春芳以崇佩。折若華以翳日。弋下高雲之鳥。餌出深淵之魚。蒲且讚善。便嬖稱妙。何其樂哉。雖仲尼忘味於虞韶。楚人流遁於京臺。無以過也。班嗣之書。信不虛矣。來還京都。塊然獨處。營宅濱洛。困於囂塵。思樂汶上。發於寤寐。昔伊尹輟耕。郅憚投竿。思致君於有虞。濟蒸人於塗炭。而吾方欲秉耒耜於山陽。沈鉤緡於丹水。知其不如古人遠矣。然山父不貪天下之樂。曾參不慕晉楚之富。亦其志也。前者邑人念弟無已。欲令州郡崇禮。師官授邑。誠美意也。歷觀前後。來入軍府。至有皓首猶未遇也。徒有飢寒駿奔之勞。俟河之清。人壽幾何。且宦無金。張之援游。無子孟之資。而圖富貴之榮。望殊異之寵。是隴西之游。越人之射耳。幸賴先君之靈。免負擔之勤。追蹤丈人。畜雞種黍。潛精墳籍。立身揚名。斯爲可矣。無惑游言。以增邑邑。郊牧之田。宜以爲意。廣開土宇。吾將老焉。劉杜二生。想數往來。朱明之期。已復至矣。相見在近。故不復爲書。慎夏自愛。璩白。

蜀秦宓答王商書

昔堯優許。由非不弘也。洗其兩耳。楚聘莊周。非不廣也。執竿不顧。易曰。確乎其不可拔。夫何銜之有。且以國君之賢。子爲良輔。不以是時建蕭張之策。未足爲智也。僕得曝背乎隴畝之中。誦顏氏之箴。瓢詠原憲之蓬戶。時翱翔於林澤。與沮溺之等。儔聽玄猿之悲吟。察鶴鳴於九臯。安身爲樂。無憂爲福。處空虛之名。居不靈之龜。知我者希。則我貴矣。斯乃僕得志之秋也。何困苦之戚焉。

晉王羲之與吏部郎謝萬書

古之辭世者。或被髮佯狂。或污身穢跡。可謂艱矣。今僕坐而獲免。遂其宿心。其爲慶幸。豈非天賜。違天不祥。頃東游還。修植桑果。今盛敷榮。率諸子抱弱孫游觀。其間有一味之甘。割而分之以娛目前。雖植德無殊。邈猶欲教養子孫。以敦厚退讓。戒以輕薄。庶令舉策數馬。彷彿萬石之風。君謂此何如。比當與安石東游山海。并行田視地利。頗養閑曠。衣食之餘。欲與親知時共歡讌。雖不能興言高詠。銜杯引

滿語田里所行。故以爲撫掌之資。其爲得意。可勝言耶。常依陸賈班嗣楊王孫之處世。甚欲希風數子。老夫志願盡於此也。

晉羊祜與從弟琇書

吾以布衣。忝荷重任。每以尸素爲愧。大命旣隆。唯江南未夷。此人臣之責。是以不量所能。畢力吳會。當憑朝廷之威。賴士大夫之謀。以全克之舉。除萬世之患。年已朽老。旣定邊事。當有角巾東路。還歸鄉里。於墳墓側。爲容棺之墟。假日視息。思與後生。味道此吾之至願也。以凡才而居重位。何能不懼盈滿。以受責邪。疏廣是吾師也。聖主明恕。當不奪微志爾。

晉陶潛與子儼等疏

告儼俟份佚。俸。天地賦命。生必有死。自古聖賢。誰能獨免。子夏有言。死生有命。富貴在天。四友之人。親受音旨。發斯談者。將非窮達不可妄求。壽夭永無外請。故耶。吾年過五十。少而窮苦。每以家弊。東西游走。性剛才拙。與物多忤。自量爲己。必貽

俗患僂俛辭世使汝等幼而飢寒余嘗感孺仲賢妻之言敗絮自擁何慙兒子此
既一事矣但恨鄰靡二仲室無萊婦抱茲苦心良獨內愧少學琴書偶愛閒靜開
卷有得便欣然忘食見樹木交蔭時鳥變聲亦復歡然有喜常言五六月中北窗
下臥遇涼風暫至自謂是羲皇上人意淺識罕謂斯言可保日月遂往機巧好疏
緬求在昔眇然如何病患以來漸就衰損親舊不遺每以藥石見救自恐大分將
有限也汝輩稚小家貧無役柴水之勞何時可免念之在心若何可言然汝等雖
不同生當思四海皆兄弟之義鮑叔管仲分財無猜歸生伍舉班荆道舊遂能以
敗爲成因喪立功他人尙爾況同父之人哉潁川韓元長漢末名士身處卿佐八
十而終兄弟同居至於沒齒濟北汜稚春晉時操行人也七世同財家人無怨色
詩曰高山仰止景行行止雖不能爾至心尙之汝其慎哉吾復何言

宋雷次宗與子姪書

夫生之修短咸有定分定分之外不可以智力求但當於所稟之中順而勿率耳

吾少嬰羸患。事鍾養疾。爲性好閑。志栖物表。故雖在童稚之年。已懷遠迹之意。暨於弱冠。遂託業廬山。逮事釋和尚。於時師友淵源。務訓弘道。外慕等夷。內懷悱發。於是洗氣神明。玩心墳典。勉志勤躬。夜以繼日。爰有山水之好。悟言之歡。實足以通理輔性。成夫亶亶之業。樂以忘憂。不知朝日之晏矣。自遊道餐風。二十餘載。淵匠旣傾。良朋凋索。續以釁逆。違天備嘗荼蓼。疇昔誠願。頓盡一朝。心慮荒散。情意衰損。故遂與汝曹歸耕壟畔。山居谷飲。人理久絕。日月不處。忽復十年。犬馬之齒已踰知命。崦嵫將迫。前途幾何。實遠想尚子五岳之舉。近謝居室瑣瑣之勤。及今毫未至。惜衰不及頓。尚可厲志於所期。縱心於所託。棲誠來生之津。梁專氣暮年之攝。養玩歲日於良辰。偷餘樂於將除。在心所期。盡於此矣。汝等年各成長。冠娶已畢。修惜衡泌。吾復何憂。但願守全所志。以保令終耳。自今以往。家事大小。一勿見關。子平之言。可以爲法。

齊張融與吏部尚書王僧虔書

融。天。地。之。逸。民。也。進。不。辨。貴。退。不。知。賤。兀。然。造。化。忽。如。草。木。實。以。家。貧。累。積。孤。寡。傷。心。八。姪。俱。孤。二。弟。頗。弱。撫。之。而。感。古。人。以。悲。豈。能。山。海。陋。祿。申。融。情。累。阮。籍。愛。東。平。土。風。融。亦。欣。晉。平。閑。外。

梁張充與尙書令王儉書

吳國男子張充致書於琅琊王君侯侍者頃日路長愁霖韜晦涼暑未平想無虧攝充幸以漁釣之閒鎌採之暇時復以卷軸自娛逍遙前史從橫萬古動默之路多端紛綸百年昇降之徒不一故以圓行方止用之異也金剛水柔性之別也善御性者不違金水之質善爲器者不易方圓之用所以北海掛簪帶之高河南降璽言之貴充生平少偶不以利欲干懷三十六年差得以棲貧自澹介然之志峭聳霜崖確乎之情峰橫海岸影纓天閣旣謝廊廟之華綴組雲臺終慙衣冠之秀所以擯跡江皋徉狂隴畔者實由氣岸疎凝情塗捐隔獨師懷抱不見許於俗人孤秀神崖每還回於在世故君山直上蹙壓於當年叔陽負舉輶轡乎千載充所

以長羣魚鳥畢影松阿半頃之田足以輸稅五畝之宅樹以桑麻嘯歌於川澤之間諷詠於澗池之上汎濫於漁父之游偃息於卜居之下如此而已充何識焉若夫驚巖罩日壯海逢天竦石崩尋分危落仞桂蘭綺靡叢雜於山幽松柏森陰相繚於澗曲元卿於是乎不歸伯休亦以茲長往若迺飛竿釣渚濯足滄洲獨浪煙霞高臥風月悠悠琴酒岫遠誰來灼灼文談空罷方寸不覺鬱然千里路阻江川每至西風何嘗不眷聊因疾隙略舉諸襟持此片言輕枉高聽丈人歲路未彊學優而仕道佐蒼生功橫海望入朝則協長倩之誠出議則抗仲子之節可謂盛德維時孤松獨秀者也素履未詳斯旅尙眇茂陵之彥望冠蓋而長懷霸山之氓佇衣車而聳歎得無惜乎若鴻裝撰御鶴駕軒空則岸不辭枯山被其潤奇禽異羽或巖際而逢迎弱霧輕煙乍林端而菴藹東都不足奇南山豈爲貴充崑西之百姓岱表之一民蠶而衣耕且食不能事王侯覓知己造時人騁游說蓬轉於屠博之間其歡甚矣丈人早遇承華中逢崇禮肆上之眷望溢於早辰鄉下之言謬延

於造次。然舉世皆謂充爲狂充亦何能與諸君道之哉。是以披聞見。掃心胸。述平生。論語默。所以通夢交魂。推衿送抱者。其惟丈人而已。關山負阻。書罷莫因。儻遇樵者。妄塵執事。

北齊祖鴻勳與陽休之書

陽生大弟。吾比以家貧親老。時還故郡。在本縣之西界。有雕山焉。其處閒遠。水石清麗。高巖四匝。良田數頃。家先有野舍於斯。而遭亂荒廢。今復經始。卽石成基。憑林起棟。蘿生映宇。泉流繞階。月松風草。緣庭綺合。日華雲實。傍沼星羅。簷下流煙。共霄氣而舒卷。園中桃李。雜椿柏而蔥蒨。時一褰裳涉澗。負杖登峯。心悠悠以孤。上身飄飄而將逝。杳然不復自知在天地間矣。若此者久之。乃還所住。孤坐危石。撫琴對水。獨詠山阿。舉酒望月。聽風聲以興思。聞鶴唳以動懷。企莊生之逍遙。慕尙子之清曠。首戴萌蒲。身衣縵襪。出藝梁稻。歸奉慈親。緩步當車。無事爲貴。斯已適矣。豈必撫塵哉。而吾生旣繫名聲之韁。鑠就良工之剞劂。振佩紫臺之上。鼓袖